

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

SULU O FEPUARI 2009

Faatonu: Ph. 27881, Cellphone: 7715037 - Main Office: Ph. 24414 - website: [www.ccs.org.ws](http://www.ccs.org.ws)

## PAPAUTA: solosolo lelei lona atiina'e



O le ata o le malumalu o le Kolisi a Teine i Papauta, itu taumatau, o le maota Samoa o le a'oga, ogatotonu, ma le maa faamanatu o le selau tausaga o le a'oga - 1891-1991. O loo tusia i le maa suafa o misionare, faletua o toaina, faletua o faifeau, o faiaoga ma isi. O le matua lelei lava o le nofoaga mo teine.

### Itulau mo Tupulaga

#### o loo iai tala nei:

Valaauina mai luga o le nofoa solofanua - *Rev. Limuaa P. Samuelu*.  
Galuega faa-misionare a le lago - *Rev. Limuaa P. Samuelu*. O Tagata  
'aisi - ma le tamaloa i le paka i Tavisitoke - Lonetona - *Afemata*  
*T.A.Aiavao*. O le Teine faatali taavale i le pogisa - ma le faataoto na  
fai e Iesu - (a short story) - *Afemata T.A.Aiavao*

*O se sailiiliga* a le Sulu Samoa, na maua ai, o loo solosolo lelei pea le a'oga a le Kolisi a Teine i Papauta, pe a sailiili atu i teine o loo su'e ma teine e pasi i le su'ega o le Samoan School Certificate (SSC). O le su'ega lea, o le su'ega a le Matagaluega o A'oga a le Malo faaauau itulau e sosoo ai

# PAPAUTA: solosolo lelei lona atiina'e

o Samoa. E le su'e le Kolisi i Papauta i le su'ega o le PSSC, ona o le su'ega lea e faato'a su'e i le vasega Year 13, ae leai se vasega Y13 a Papauta.

A manatu atu foi i teine o loo a'o'oga i le a'oga, e le taumate e tele lava i nai teine mai aiga vaivai o le Ekalesia, e le mafai ona ofi atu i a'oga tetele a le atunuu e pei o le Kolisi o Samoa, St. Joseph's, St. Mary's, Avele, Vaipouli ma isi. A ua latou maua avanoa i le Kolisi a Teine i Papauta, ma mafai ona latou totogiina pili o le a'oga, aua e le taugata tele. O le pili o le nofo tumau i Papauta, e na o le \$75 i le kuata, a o le nofo tumau i Leulumoega Fou, e \$100 i le kuata. O le pili o Papauta i le tausaga atoa e \$135 e le aofia ai le pili o le nofotumau.

O le a'oga a Papauta, e iai a'oa'oga faapitoa e faia ai. E pei o isi a'oga e pei o le Iunivesite o le Amosa o Savavau, e faa-Samoa lona faiga, e matua a'oa'oina ai tu ma aga ma le gagana Samoa, ae ave ai foi isi mataupu masani e fai foi i isi iunivesite. E iai foi la a'oa'oga faapitoa e faia i le a'oga i Papauta. A o mataupu autu o le English, Mathematics, Gagana Samoa, Social Science, Computer Studies, Business Studies, Religious Knowledge ma le Samoan Shorthand (Faa-fonokarafi), Ma, ona e toto e teine a latou lava laau 'aina, ma fai e latou a latou meaai, o le mea lea, e popoto ai foi i fai fe'au faa-Samoa, poo fe'au masani o le olaga i le 'aiga i aso faisoo.

Mo matua e naunau ina ia a'oa'oina le teine i amio pulea lelei, e maua i Papauta. A naunau matua e saogalemu lelei le la tama teine mai le tele o faafitauli o le

olaga, e maua i Papauta. A naunau matua ina ia su'esu'e mataupu a le la tama teine i afiafi uma ae le alu e tafaovale, e maua i Papauta. A leai se mea e nofo ai le tama teine i Apia ma a'oga, o Papauta e maua ai. Tasi lava le mea e fai e matua, o le taumafai lea e saili pili o le teine, ae lafoa'i mai i faia'oga ma le pule o le Kolisi o Papauta, le vaaiga, tausiga, ma le a'oa'oina o le teine. Ona leai lava lea o se popole o matua poo saogalemu lo la alo i se mea o nofo ane ai i Apia, pe leai.

I le vaavaai atu ma faatusatusa togi o i'uga o suega i a'oga uma a le Ekalesia, i le su'ega lea o le Samoan School Certificate, e lelei i'uga o su'ega a Papauta. (Silasila i a'oga ma o latou pasi ma togi na maua i le su'ega o le Samoan School Certificate (SSC) ma le PSSC. E le su'e Papauta i le PSSC ona e leai se Year 13.

E to'a 45 teine o loo a'o'oga i Papauta. O le teine aupito la'iitiiti

e 12 tausaga, a o le aupito matua e 17 ona tausaga. E fai le su'ega ulufale i a'oga uma a le Ekalesia, ma filifili e le tama ma le teine le a'oga e fia alu i ai.

E iai le tupe mai le paketi a le Ekalesia mo meaai a teine. E faatau ai mealelei. Ae iai togafa'i misiluki ma ulu a le a'oga. Na o le pule ma le ulugalii misionare mai Initia e nofo tumau ma latou vaaia teine, ae tausavali uma isi faia'oga. E to'a 12 le aofa'i o faia'oga. O le tamaitai misionare faiaoga mai Initia, lea e nofo tumau i le a'oga, e iai lona faailoga o le Master of Theology ma le B.Com. (Batchelor of Commerce), mo le aoaoina o mataupu tau pisinisi. O le faiaoga o le Igilisi e iai lona faailoga o le BA English mai le NUS ma le Dip. Education. O le faiaoga o le Gagana Samoa e iai lona faailoga o le BA mai le Iunivesite o le Amosa o Savavau.

*faaauau i le itulau e sosoo ai*

	No. of students	2007		No. of students	2008	
		Pass	Fail		Pass	Fail
Maluafofou	105	60	45	26	20	6
Tuasivi	47	28	19	22	12	10
CSC	41	22	19	141	23	118
Leulumoega	86	48	38	42	25	17
Nuuausala	37	17	20	12	8	4
Papauta	8	7	1	X	X	X
Papauta	8	7	1	X	X	X
Maluafofou	113	23	90	43	9	34
Leulumoega	82	26	56	40	6	34
CSC	55	10	45	118	17	101
Tuasivi	39	19	20	19	2	17
Nuuausala	52	10	42	23	6	17

# FAILAUGA SULU SAMOA 2009

<u>MASINA</u>	<u>FAIFEAU</u>	<u>AULOTU</u>	<u>MATAGALUEGA</u>
Ianuari	LIKI TIATIA FT	Dominiquez	Amerika
Fepuari	FAAPAIA TARIU FS	Vailoa uta	Faleata
Mati	VAEGAAU LIKO FS	Hutt Valley	Niusila i Saute
Aperila	IAEVA AMITAI FS	Safaatoa-tai	Aana
Me	RISATI PALEMENE FT	Graigieburn	Vitoria
Iuni	LAUITIITI VAEGA FS	Matavai	Itu-o-Tane
Iulai	UTUFUA NASERI FS	Apia	Apia i Sisifo
Aokuso	AMOSVAETOEIFAGA FS	Matautu Falealili	Falealili i Sisifo
Setema	VAIGALO MAUA FS	Lufilufi	Apia i Sasae
Oketopa	LANESELOTA OPETAIA FS	Fagafau	Faasaleleaga
Novema	FILI S. MATALAVEA FS	Faleula	Malua
Tesema	SUAFAI PATU FT	Lepa	Falealili i Sasae

Faamolemole le Au-fai lauga ina ia vave faaoo mai lau lauga i le ofisa o le Sulu Samoa po o le ofisa o le Failautusi Aoao a o toe lua vaiaso o lumanai ai lou masina. Ia manuia le laugaina o le upu.

= Faafetai = **KOMITI O LE SULU SAMOA**

O le faasologa leni o failauga mo le Sulu Samoa mo lea masina ma lea masina, na faalauiloa atu i le Sulu Samoa o Oketopa 2008. O leni ua toe lolomi atu e toe faamanatu atu ai i e ua tofia mo lea masina ma lea masina.

## **PAPAUTA : solosolo lelei lona atiina'e**

O le faiaoga o le Geography e iai le faailoga o le B.Ed. mai le NUS. O le faiaoga o le Mathematics e iai lona tusipasi o le Dip. Ed. mai le NUS.

Na ou fesili pe lelei meaai a teine, ae tali le pule aoga, o le matua lelei lava. O le 'aiga o le taeao o le koko araisa, fa'iota, esi. O le 'aiga o le aoauli o se supo moa, poo se sua eleni e fai i le laupele ma se miti e alu ai ni popo

se 30 tatau iai ma se tipolo. E matua tele popo a le a'oga. O le 'aiga o le afiafi o se kopai, koko araisa, panikeke, poo se umu faapapa ma se valuvaluvi aua e tele le vi i Papauta. E mama le 'aiga o le afiafi ona o a'oa'oga a foma'i fai mai e le tatau ona tele se 'aiga o le po ona o le a malolo e le mana'omia ai ni meaai se tele e taumafaina. O le 'au faai'uasoo e le toe fai meaai i le kuata e lua ma le tolu, ae matua faasaga e su'esu'e mo a latou su'ega i le faaiuga o le tausaga. E iai tama faigaluega e to'atolu e galulue i le tausiga o fanua o le a'oga, ae ua le toe tausua e teine e pei ona sa iai i aso ua

mavae. Ae fai lava e teine o latou togalaau 'aina (vegetable garden).

I le o le Kolisi i Papauta, e pei foi o a'oga a teine i isi atunuu, e aoaoina ai mataupu masani, ae aofia ai foi ma mataupu e patino lava mo teine latou, i se nofoaga saogalemu, ma le malu puipuia. Ma a fuafua atu foi i le aofa'i o teine e 45 ma faiaoga e to'a 12, tusa lea o le to'afa teine i le faiaoga e toatasi, o le matua tele lava o le taimi o le faiaoga e mafai ai ona ia fesoasoani atu ai i lea teine ma lea teine, i mea e fia malamalama ai, i lo isi a'oga e oo atu i le to'a 60 tamaiti i le vasega e tasi, poo le faiaoga e toatasi!

*A.T.A. Aiavao.*

(silasila i le isi ata o Papauta i le itulau e 16)

# 'A'ami le faifeau fou a le EFKS i Lepea

O sina faamatalaga puupuu lenei i le osiga feagaiga a le aulotu i Lepea ma lo latou faifeau o Esekia Peneueta ma le faletua ia Asofiafia.

Sa faataunuuna lenei faamoemoe taua i le taeao o le Aso Faraile 27 o le masina o Fepuari 2009.

Na feiloai lava i le malumalu mo le tapuaiga e osi ai le taulaga ma faamausaliina ai le mafutaga i le osiga o le feagaiga i le 9.00am i le taeao.

Sa taitaiina le sauniga e le Susuga i le Toeaina o le Pulega, Susuga Tavita Anesone F.T. Sa lagolagosua i lenei sauniga le afaigaluega o e o loo galulue punouai i le Pulega a Faleata i

Sasae: faitauina o le Tusi Paia - o Peleti Solomona (Lotopa), tatalo - Apisaloma Aiono (Aleisa i Sasae), lauga (1) - mo le faifeau - Amosa Reupena (Vaimoso); (2) - mo le aulotu - Elekosi Viliamu (Aleisa i Sisifo).

O le Tofa ia Vaitagutu Viliamu Masoe sa fai ma sui o le aulotu e faafeiloai le faifeau fou, ma saunoa foi le Susuga ia Esekia e fai ma sui o lo la aiga ma le fanau e faailoa le agaga faafetai i le Atua ona o tofiga ma le faaaogaina o le ola.

Sa matua faatumulia le tapuaiga e le gata o le aulotu i Lepea a o aiga ma uo a le faifeau ma le faletua.

O le maea o le sauniga, sa agai

atu ai loa i Siufaitotoa i le mea o iai le maota o le faifeau mo fale o le aulotu e faatino ai le taumafataga.

Sa tausiusi lava i Iugafono Tumau e sa ta'igasua ma toga i amiga o faifeua. Peitai e lei taofiofia ai le agaga fiafia ma le agaga faafetai o aiga-na-lua o le faifeau ma le faletua aua pelega o taulaga soifua, o lupe faalele aua le Atua ma le Tala Lelei.

O moomooga lava o le agaga ia faaau'upegaina e le Atua le Susuga ia Esekia ma Asofiafia, i auupega o le Agaga. Manuia foi le tapuaiga ma le tatalo a aiga-na-lua, o afioaga ma ekalesia na tofusao i le faafaileleina o lo la soifua faale-agaga aua le galuega a le Atua.

Alofagia foi le aulotu i Lepea ina ia matua faaalua lo latou alolofa i le Atua e ala i le mafutaga ma le sui vaaia o le Atua.

## Se Aiga mo Fereti

(O se tala na tusia e Abbie Blair, ma lomia i le Reader's Digest o Tesema 1964. Faaliliuina e A.T. Apelu Aiavao)

Ou te manatua lava le taimi muamua na ou vaai ai ia Fereti. Sa tu i totonu o lona moega taalo i le nofoaga e vaetama ai tamaiti lea ou

te faigaluega ai. Na vaai mai ia a'u ma 'ata ma aliali mai ai ona nifo fou. Na ou manatu ifo i lo'u mafaufau, "Matua manaia si pepe!"

Na sii a'e e lona tina tausi, ma fesili mai ia a'u, "E mafai ona e maua se aiga mo Fereti?" Ona ou faato'a iloa atu ai lea! Oi talofa e! O Fereti e leai

ni ona lima. Na fanau mai o ia e leai ni ona lima!

"O le poto ia! Faato'a sefulu masina lona matua ae ua savali ma tautala." O le tala lea a le tina tausi ma fai i si mea, "Fai ia Misi Pelea, 'tusi'."

Na o le 'ata mai o Fereti ia a'u ma sulu ane lona ulu i le tau'au o lona tina tausi. "Se 'aua e te faapena ae fai sau tala! O le fiafia ia i tagata. O le lelei ia o le tama."

E faamanatu mai ia a'u e Fereti la'u foi tama a o faapena lona matua: lauulu uliuli mafiafia migimigi, 'ena'ena ona mata.

"E le galo ia oe, Misi Pelea? E te taumafai e saili se aiga mo Fereti?"

"Leai! O le a ou manatua."

Na ou alu i le fogafale i luga, ma su'e la'u api e tusi ai igoa o tamaiti e faigata ona maua ni 'aiga e vaetamaina.

O Fereti o se tamaitiiti papalagi Porotesano, e sefulu tausaga lona matua, o ona matua e tupuga mai i Peretania ma Farani. E 'e'ena ona mata, ma uliuli 'ena'ena lona lauulu. E ui lava na fanau mai Fereti e leai ni ona lima, ae malosi lelei lava. Fai mai lona tina tausi ua amata

*faaauau itulau e sosoo ai*

### *Leadership*

**Are you a leader?**

**Look behind and see**

**if anyone**

**is following.**

**He who thinks he is leading**

**and no one**

**is following**

**is only taking**

**a walk.**

*Author unknown*

### *Worship*

**To give God the service of**

**the body and not of the**

**soul - is Hypocrisy;**

**To give God the service of**

**the soul and not of the**

**body - is Sacrilege:**

**To give God neither is**

**Atheism:**

**To give God both**

**is Worship.**

# Se Aiga mo Fereti

ona aliali mai e fai lava sina poto atu o Fereti nai lo isi tamaiti e tupulaga faatasi. Ma o lea ua savali ma tautala mai foi ni nai upu. E aga malie ma fiafia i tagata. Na tuuina atu e lona tina na fanauina o ia, ma o lea ua mafai ona vaetamaina atu.

Ae na ou mafaufau, "E moni ua ono vaetamaina, ae o ai a mana'o iai?"

I se tasi taeao o le taumafanafana i le ofisa e vaetamaina ai tamaiti, sa tumu ai le ofisa i matua e o atu e saili ni a latou tamaiti, matamata i tamaiti o loo iai, ma faatalanoa itu uma e mana'omia mo le vaetamaina o tamaiti. O nei matua uma, toetoe o latou uma lava, o moomooga lava, ia maua se tamaitiiti tai foliga ia latou, aemaise lava, o se tamaitiiti e leai ni ona faaletonu tau lona tino ma lona mafaufau.

O le manatu o le toatele, "A tutupu mai ni faafitauli mulimuli ane i se tamaitiiti, o se vaega lena e feagai ma latou, e pei o isi foi matua ma a latou lava fanau. Ae o se tamaitiiti o loo iai ni ona faafitauli a o lei vaetamaina, ia, e faigata lena." A o ai na te faitioina lea popolega?

E le na o a'u na sailia ni matua mo Fereti. Sa faia foi e isi o le aufaigaluega a le nofoaga mo tamaiti e vaetamaina atu, e moomoo lava, ia maua se ulugalii e manana'o ia Fereti. Ae na sau aso, alu aso, te'a le taumafanafana ae oo mai le taumalulu, a o lea lava e le'i mana'o se ulugalii la te vaetamaina Fereti.

O'o loa i le isi aso, o'u maua! Na ou tau atu i la'u faila i le igoa o le ulugalii o faamauiina ai. O Faranisisi ma Eteuina Peasoni. O le tina e le faigaluega, e 41 ona tausaga; ma le tama e 45 ona tausaga, e ave loli.

Ona ou alu lea matou feiloai, i lo la fale i se fasi fanua tele e iai ni lauu tetele mananaia. Na faafeiloai mai a'u i le faitotoa, fiafia ae popole foi. Na sii mai le ipu kofe vevela ma masi keke. Sa nonofo faatasi i le sofa, ma uu lima. Fai mai Faranisisi, "O le aso e atoa iai le sefulu valu o tausaga talu ona ma faaiiipo."

"O ni tausaga lelei ma le fiafia." o le tala lea a Eteuina, ma tepa ane i lona to'alua. "Vagana...."

"Ioe," o le fai ane lea a Faranisisi, "e talanoa, talanoa lava ae tau lava i le vagana...." Na vaavaai solo o ia i le potu malolo ma fai mai, "E mama tele, leai ni

otaota ma ni mea e salalau solo. E te iloa? Ona o le leai o ni tamaiti."

Na ou mafaufau i lo'u potu malolo ma la'u fanau e to'atolu lea ua matutua. "Ioe, e moni lava oulua."

"Atonu e le taumate ua ma matutua!"

Na ou 'ata ma ou fai atu, "Leai, lua te le'i matutua."

"E te manatu lava atonu o lea masina e maua ai, poo le masina e sosoo ai," o le tala lea a Eteuina. "Tele fesili ma su'esu'ega ma faatalalanoaga, ae alu lava aso, ae leai lava se tamaitiiti. Na tau maua i le isi taimi, ae te'i ua fai mai le ofisa e vaetamaina tamaiti, e laititi lo ma fale. Ona faatau ai lea le fale lena e tele. Ae toe fai mai foi e leaga e le lava a ma tupe. Ona ma manatu ai loa lea, ia, ua lava ia lea. Ae te'i ua ta'u mai e se ma uo lou suafa, ona ma faafesoota'i atu ai loa lea o oe, atonu o le toe taumafaiga lava lea ona gata ai loa lea."

"Ua ou matua fiafia i lau lua faai'uga," o la'u tali lea.

Fai mai Faranisisi, "E mafai ona ma filifili? Se tama mo si o'u toalua!"

Na ou tali, "Se'i tatou amata i se tama. O le a le ituaiga tama?"

Ae fesili mai Faranisisi, "E toafia ni ituaiga o iai? Na o se tama. E fiafia lo'u toalua i afeleti. E fetau lava iai se tama."

Fai mai Eteuina, "E mafai ona e ta'u mai pe o le a le umi. Ua tele tausaga o ma faatalitali. E le o iai lava se tamaitiiti i se mea? E le tele ni a ma tupe e pei o isi tagata. Ae tele lo ma alofa mo se tamaitiiti."

"Ia ua lelei." Na ou taumafai atu ai i le ulugalii. "E iai le tamaitiiti. E 13 ona masina.

Fai mai Faranisisi, "Manaia lona matua!"

Na ou fai atu, "O lona ata lea," ma ou tuuina atu ia la'ua le ata. "O se tamaitiiti poto, fiafia, malosi. Peitai, na fanau mai e leai ni ona lima."

Na matamata i le ata; vaai atu Eteuina i lona toalua ma fai atu, "O le a lou manatu Faranisisi?"

"E mafai ona e a'oa'o iai le kikiina o le polo."

Fai mai Eteuina, "E le taua tele afeleti. E mafai ona faaoga lona ulu. E le afaina le leai o ni ona lima. Ae taua le iai o le ulu. E mafai ona alu i le kolisi. E mafai ona faasaosao se ma tupe e fuafua i lana

a'oga."

Fai mai Faranisisi, "O le tama lava o le tama. E tatau ona taalo. Ae mafai ona e a'oa'o ina e taalo."

"Ioe, e mafai ona ou a'oa'o ina. E le afaina le leai o ni ona lima. E mafai foi ona ta sailia ni ona lima."

Ua talanoa lava a ua le manatua a'u. E le taumate e sa'o Eteuina. E mafai ona fai ni lima faapipii o Fereti, aua o lea e iai tafu'e o ona ogalima e faapipii i ai ni ona lima fai.

"E lua te fia vaai iai?"

Ae taufai tali mai, "O afea e mafai ai ona ma maua?"

Na ou toe fai atu, "Mata lua te mananao iai?"

Tali Eteuina, "Ma te mananao iai."

Na ou fai atu, "O lona igoa o Fereti, ae mafai ona lua suia le igoa."

Ae tali Misi Peasoni, "Leai. E le suia. E faaigoa ia Feretika Peasoni.

O le vai taimi o le Kerisimasi. Ua teu alatele o le aai i moli Kerisimasi ma isi teuteu matagofie. Toto mai foi le kiona ma pa'epa'e ai le laueleele.

Na taunuu mai Eteuina ma Faranisisi Peasoni ma matou feiloai i le ofisa.

"Tatou o i luga ona ou tuuina atu ai lea o ia ia oulua."

"Ua tete lota moa," o le tala lea a Faranisisi. "Ae faapefea pe a le fiafia ia ma'ua?"

Na tuu lo'u lima i lona tau'au ma ou fai iai, "Se'i ou alu e aumai."

Ou te alu atu ua uma ona faaofu Fereti i le suti pa'epa'e, e iai ma teuteu fugalaa. Ua uma ona selu lelei tavi'o o lona lauulu uliuli mafiafia.

E tuu mai e lona tina tausua ia a'u ae fai mai Fereti, ma 'ata, "Alu aiga fou."

Fai mai le tina tausua, "Na ou ta'ua iai o le a alu i lona aiga fou."

Na maligi loimata o tina tausua ma sogi ia Fereti, ona tuu mai ai lea ia a'u.

".....'Fa pepe! Amio lelei."

Ae 'ata fiafia Fereti ma tali mai, "Alu aiga fou."

Na ou tuu i lalo Fereti e lata i le faitotoa. Ona ou tatalaina ai lea o le faitotoa ma ou fai atu, "Manuia le Kerisimasi!"

Na faatau pupula atu Fereti i le ulugalii o tutu mai. Na faatau pupula mai foi iai le ulugalii. Ona tootuli ifo ai lea o Eteuina Peasoni i lona tuli e tasi, ma fai atu, "Feret, sau. Sau lou tama!"

Na liliu Fereti ma vaai mai ia a'u mo ni nai sekone. Ona toe faasaga ai lea ia Eteuina ma Faranisisi. Ona faaloaloa mai ai lea o la lima, ma sii ia Feretika Peasoni.

**A Page for Youth**  
**ITULAU MO TUPULAGA TALAVOU**

## O LE LAUGA

### Aso o Tupulaga - 8 Fepuari 2009

Saunia e Rev. Faitoaga Tolua F.S.  
Faatonu Lagolago,  
Matagaluega A'oa'oga Kerisiano

F. Tuai: Eseta 2: 5 - 7, 17 - 18  
F. Fou: Galuega 3: 1 - 10

Matua: Eseta 4: 13-14: *“Ona fai mai lea o Moretekai ia tali atu ia Eseta, Ne'i e manatu i lou loto, ina ua e i ai i le aiga o le tupu, e faasaoina ai oe ai Sa Iuta uma. Aua afai e te matua faalologo i nei ona po, e tupu mai le tuusaunoaina ma le lavea'iina o Sa Iuta mai se tasi mea; a o oe ma le aiga o lou tama e fano outou; e iloa foi e ai po ua fai oe ma masiofo ona o se aso faapenei?”*

Manatu Autu o le Aso Sa: E ILOA E AI, PO UA FAI OE MA MASIOFO ONA O SE ASO FAAPENEI?

Manatu Autu o le Vaiaso: FAAUINA E TALA'I LE TALA LELEI I LE TAFEAGA.

O le Tusi ia Eseta o loo faamauiina ai le alofa faaola o le Atua, na ia faaola ai tagata o lona nuu, mai le taupulega e fasiotia uma ai. O le faaolataga na faatonutonu ma ta'ita'i e le Atua, e ala i mea na tutupu, ma uiga o tagata. Ae maise i le auala o le faaeaina.

1. O le faaeaina o le tupu o Asueru ma le malo Metai ma Peresia.

O le faaeaina na maua mai le pule aoao a le Atua, na te faaoga tupu ma faigamalo i soo se taimi e finagalo ai, e fai mana auupega, e faataunuu ai ana fuafuaga mamana ma le alofa, mo le manuia o lona nuu, tainane le lalolagi atoa.

Na faaeaina muamua e le Atua Nepukanesa ma le malo Papelonia, e a'oa'i ai lona nuu o Isaraelu, e ala ai le tafeaga. A o lea ua faaeaina ma faaoga Peresia, e toe a'e ai le tafeaga, e faasaoloto ma toe faafoi ai Isaraelu i o latou laueleele.

E iloa gofie tupu ma malo e tofofi e le Atua, ina ua aoga mo lana galuega faaola. E iloga atunuu ma pulega, o loo i totonu o fuafuaga a le Atua, ina ua o gatasi a latou tu ma aga, ma le finagalo alofa o le Atua. Ina ua fesoasoani ma lagolago a latou taupulega ma tulafono, i le ola saoloto ma le ola manuia o le fanau a le Atua.

2. O le faaeaina o Moretekai. O le faaeaina o le tama alofa faamaoni i lona aiga. O Moretekai na agalelei ia Eseta ua matuaoti, o le afafine o le uso o lona tama, o ona lava tino, aano ma toto moni.

O le faaeaina o Moretekai e le'i mafai ona ifo ia Hamanu; sa sili lona mata'u i le Atua, nai lo le fefe i le tagata. Moretekai na ia iloa ma lipoti le taupulepulega leaga faasaga i le tupu o Asueru, ma faasaoina ai le soifua o le tupu. Na galo i le tupu le mea lelei na fai e Moretekai. Peitai e le'i galo i le Atua. E i ai lava lona aso ma lona taimi, na te faaeaina ai le tagata

aaua faamaoni, e le fefe e tautala i le amiotonu; e iai le taimi na te faaeaina ai le tautua malo, le tautua matavela, tautua toto, tautua le leoa. O le ala lea e tasi i le pule ma le faaeaina.

3. O le faaeaina o Hamanu, lea na toe faaleaogaina, ona sa ia faaoga sese lona faaeaina, e faufau ma taupule ai le fasiotia o Sa Iuta, o ona uso a tagata o latou nonofo faatasi, e tautua faatasi, i le malo e tasi. O le ta'ita'i e manatu faapito na o ia lava, e faailoga tagata faailoga lanu, e tau ma sui, e le lelei lona loto.

O le natura lava lenei faa-Amaleka, lea e tupuga mai ai Hamanu. O le fili tuufaasolo o tagata o le Atua mai le amataga, e oo mai nei lava.

E i ai fili i soo se mea e i ai tagata o le Atua. E tutupu faatasi le saitō ma le titania. Ae manino le i'uga. E faaolaina Moretekai, a o Hamanu na toe tautau i lana laau na fafau.

O le faaeaina o Vasati, sa faapea foi ona toe faaleaogaina. Ona o lona le usitai i le ulu o lo'ua aiga. Ua ia faamasiasi lona alii le tupu i luma o tagata, ma faamamasagia ai lona tofi ma lana pule.

Ua manatu nisi e tonu ma ua tata le tetee na fai e Vasati. Aua o le mana'o o le tupu e alu ane le masiofo, e faaali lona lalelei i luma o tagata, ua iloa ai le faatama o lana tofa; o se mea faavalea, ona ua pulea e le malosī o le uaina. O le pogai lea ua ta'uleleia ai e nisi le tetee a Vasati, le masiofo muamua. O le finauga i le aia tata a lea ituaiga, ma le tetee atu i faiga sauā ma le soona fai. Peitai e sili lava ona taua le mau, i le loto maualalo, ma le ola usiuitai faamasiofo, e faasatauro ai ona mana'o, ina ia faataunuu le finagalo o le tupu. O le faaleaogaina o Vasati, na galue

ai le Atua, mo le faaeaina o Eseta.

5. O le faaeaina o Eseta. O le faaeaina o le tagata le tualoa, le tagata le taulia, e faatauvaa, e ausage, e mativa, e vaivai ma maulalo, pe a faavasega i le faatulagaina e masani ai sosaiete o tagata. O le tamaita'i i le saofaiga a tamatane; o le talavou i le saofaiga a le au matutua, le au fai uta ma le au fai tofa; o le matuaoti, o le tamafai i le saofaiga a suli moni, o le tagata faatafea i le nuu ese. E oo i lona ituaiga o Peniamina o le uii o le fanauga a Iakopo, ua ta'u mai lava, ina ia matilatila Eseta o le tagata e mulimuli, e faatauvaa.

Le tagata faatauvaa a o iai se meaalofa, o iai se taleni mai le Atua, e ui ina tasi, e ui ina itiiti, ae faaoga tatau ma faaoga lelei, e manuia ai lona ola, e manuia ai lona aiga, e faaola ai nisi tagata.

O le meaalofa a le Atua sa ia Eseta, o lona lalelei. ***"O le teine foi ua lalelei lona tino, ma ua lalelei ona mata."*** E taua ma aoga foliga lalelei, aua e atagia ai le Atua mamana ma lona matagofie, na ia faia le tagata. E le'i avea le lalelei o Eseta, e mitamitavale pe faualuga ai. Na lagona pea le loto maulalo, e vivii i le Atua, e faafetai i matua na fanaua o ia, i ona foliga talavou lalelei.

O foliga lalelei, o le gagana lea a nisi tusitala e faamatala ai le maloloina i totonu o le loto ma le agaga o le tagata. Le loto ua matagofie e tusa ma le silafaga paia a le Atua. Le loto ua agavaa mo le galuega faaola a le Atua.

E pei o le valaauina o le tama talavou o Tavita. O le vaai a Samuelu ia Tavita o loo faamatalaina, ***"ua enaena mumu lona lauulu, ua manaia foi ona mata, ma ua aulelei lava"***. E faamatala mai ai ua tonu i le

silafaga ati a le Atua, ua agavaa le loto o le tagata mo lona faamoemoe. Aua e vaai le tagata na o le tino, ae silasila le Atua i le tino faatasi ma le loto. O le loto e alofa, le loto e mama, e agamalu ma isi uiga lelei uma e finagalo ai le Atua. Le loto e mafai ona ofo atu e oti mo le laveaiina o ona tagata.

Le ituaiga loto lea na faapaleina ai Eseta i le palealii, ma nofo i le nofoalii o le malo, i le maota i Susana.

E le'i faigofie ia Eseta lona faato'a tula'i mai o le masiofo, ae faaee atu le avega, i le mana'o o Moretekai mo le lavea'iina o le nuu. Ua maua e Eseta le tala faanoanoa i le tulafono ua pasia e Metai ma Peresia, i luga o le fautuaga a Hamanu, ina ia fasiotia tagata uma o Sa Iuta.

O se filifiliga faigata tele ua feagai nei ma le masiofo. E alofa i ona tagata, ae taua foi le avanoa e le au maua, ne'i toe maumau le avea ma masiofo. Afai ua faafitifiti o ia ma foliga mai na te le mafai ona fesoasoani, o le faaaliga o se teine talavou e ola faautauta, ola faaaloalo i tulafono o si'osi'omia ai lona ola. O le tulafono faavae o le maota, afai e iloa o ia i le lotoa a le tupu, e aunoa ma se faatagaga, o lona i'uga o le oti.

***"Ona fai mai lea o Moretekai ia fai atu ia Eseta, Ne'i e manatu i lou loto ua e iai i le aiga o le tupu, e faasaoina ai oe ai Sa Iuta uma. Aua afai e te matua faalologo i nei ona po, e tupu mai le tuusaunoaina ma le lavea'iina o Sa Iuta mai se tasi mea; a o oe ma le aiga o lou tama, e fano outou; e iloa foi e ai po ua fai oe ma masiofo ona o se aso faapenei?"***

Ua talitonu Moretekai e le o lilo i le silafaga a le Atua leni mala; e talitonu foi o ia e le oge auala le

Atua e faaola ai lona nuu. E pei ona ia fai le auala e faasaoloto ai le tafeaga, e faapea foi i leni puapuaga ua tula'i mai. Aua o le Atua e faatafea ma puapuaga faatasi ma ona tagata.

Ae o le fesili ma le lu'i tele mo Eseta, i lona saofaga i le nofoalii, ma lona tula'i mai i leni tofi maualuga ma mamalu. O lona avanoa lea mai le Atua, o lona taimi lea mai le Atua, na te faatinoina ai le finagalo alofa o le Atua, ma le faaolataga mo ona tagata. E moni e le au maua avanoa i tofi ma tulaga, ae sili ona le au maua avanoa, e fai ai ma meafaigaluega a le Atua mo lana galuega lavea'i i puapuaga o ona tagata.

O se tuu faatasiga lelei tele, le mana'o o le tama, ma le tali atu a le atalii. Le alofa moni faa-matua, na te le tuu fau, pe tuu faasa'oloto, pe faapelepele i lona atalii, ae a'oa'i e ola i le alofa. Ma le alofa o le atalii, e tuu lona loto, ae fai le finagalo o lona tama.

O le alofa o le mea e fai i le taimi nei. O le faaolataga e fia fai mo le aso nei. E le afaina taeao, e totofi e le Atua nisi tupu ma nisi masiofo mo taeao ma ona leaga. Ae o le taimi nei, ma le puapuagatia o le aso nei, o le mea tonu lea na filifilia ai oe e fai ma masiofo.

Samoa lo'u atunuu pele, o lou malo o le malo e faavae i le Atua. O lona uiga, o loo fia faaoga e le Atua lou malo e fai mana mea faigaluega mo lana galuega faaola i ona tagata. E fia faaoga e le Atua au tu ma lau aganuu mo le ola manuia ma le ola saoloto o ou tagata.

Ua le o toe po malae, i lou aafia mai pulega ma fefaatauaiga faavao-malo tetele. E ui ina e tutoatasi, ae ua pei o Sa Iuta e pulea e Metai ma Peresia. Ua lamatia le nofo

*faaauau itulau e sosoo ai*

saogalemu, le ola saoloto, le lumana'i manuia o ou tagata.

E le gata i lea, ae o le alaga o le fiaola o loo lagona i soo se tulimanu o le atunuu. E lagona pea le leo o le mafatia i le taugata o le soifuaga. Ua iai nisi alalafaga ua taofia le faaogaina o oloa mai fafo i le faatinoga o tu ma agaifanua. Ua le gafatia le taugata.

E manatu nisi o loo taugofie, o loo lelei le tau o mea i le taimi nei. O loo lelei le \$80 i le taga araisa. \$70 i le pusaapa. E manatu o loo taugofie le tau'i'a, le mamoe. Amuia i latou o loo latou gafatia.

E le popole foi nisi, aua o loo tua i le vao ola. Ae tusa ma le ola a le tagata lautele, ua mana'omia lava se galuega faaola, mai se masiofo alofa. Ua fia maua ni Eseta ma ni Moretekai alolofa faamaoni, latou te faia se faaolataga.

E fesoota'i lava le taugata o le soifuaga, ma isi faaaitaui esee, aua ua saili solo tagata i soo se aualea e manuia ai, e le afaina pe tusa ma le tulafono. Ua mafua ai amioga le taupulea i totonu o aiga ma nuu, o faalavelave mata'utia ma soliga tulafono ogaoga, i le faaoga sese o aia tatau, faaoga sese o le pule.

Ua faapea foi le tulaga faigata ua iai tupulaga ma a tatou fanau i nei ona po. O amio faatafea i tu ma aga faapaupau. O le fia faata'ita'i ma fia mulimuli fua i faiga a isi tupulaga. O le fia lauiloa ma fia ta'uta'ua i mea valea.

O loo saili e le Atua ni Eseta mo nei ma taeao. Ni Eseta lalelei amio, lalelei loto ma agaga, tama ma teine e manuia ai aiga, faaemalo ma atia'i le Ekalesia.

Ua avea le aai ma le maota i Susana, ma nofoaga e tupuga mai ai lagona o le alofa, o le nofoaga e afuafua mai ai galuega faaola mo le nuu o le Atua, a o faatafea. Sa nofo ai Tanielu i le aai lea. Lea foi

ua iai Eseta, ma ua nofo sauni e fai le galuega faaola. Fai mai ana upu lauiloa, "O le a ou alu i le tupu, o le mea e le tusa ma le tulafono; afai ou te oti ai, oti ai pea ia."

Ua tofia lau afioga, ua faaeaina lau fetalaiga ma valaauina lau susuga, i lena tofi ma lena tulaga maualuga, e te fai ma taitai ma auauna ai. Ua e saofaga ai i totonu o le maota, ua e afio ai i le nofoalii. E iloa e ai po ua fai oe ma masiofo ona o ni aso faapenei? Afai e te talitonu o lou valaauina e mai le Atua, e tatau foi ona e sauni e fai ma mea faigaluega a le Atua, e fai le galuega faaola mo ou tagata ua lamatia i le oti matelaina.

Tulafono a Metai ma Peresia, e le mafai ona talaina e se tasi. Peitai na mafai e Moretekai ma Eseta ona faaleaogaina le tulafono ua uma ona pasia, ma laveaiina le ola o tagata semanu a maumau. Na mafai e le lotonuu ma le alofa moni. Na mafai aua o loo galue ai le Atua alofa.

E te mafaia foi Samoa. O le a le maumaututu o au tulafono ua pasia, e mafai e le alofa ona toe solofa, e ala i nisi foi tulafono. O le a le mausali o au tu ma aganuu, o le a le matagofie o lau faaloalo ma faiga masani o le ola faaeaea, ae afai o oi ma pologa ai ou tagata, e tatau ona toe liuliu, e fetuutuuna'i, tainane ina faaleaoga. E taua ia i tatou la tatou aganuu. Ae sili ona taua i le Atua lana tagata, ia 'aua nei matelaina.

O le galuega faamasiofo, o le galuega faa-tina, faa-faletua ma tausii, sa'oao ma tamaitai. O le feagaiga, fai mai o le pae ma le auli, o le tina o le galuega. E le'i soona tofia oe e fai ma masiofo i tupu o le atunuu, i ta'ita'i o le malo ma faauluuluga o Ekalesia ma aulotu. Na filifilia oe ona o aso leaga; aso faapenei.

E toatele tupu ma ta'ita'i, e pei o

Asueru. E iai vaivaiga. E faavalea le amio i nisi taimi, e faatama le tofa i nisi taimi, e galogalo mea i nisi taimi, e pulea e le uaina i le tele o taimi. E mana'omia ni masiofo fautua poto, fautua lelei. O lau fautua e ola ai le aiga, e ola ai le nuu.

Ua fai oe ma faatusa o le Ekalesia, i lona va nonofo ai ma Iesu Keriso, le Ao o le Ekalesia. O tagata faatuatua uma, o e ua talitonu ma mulimuli ia Iesu Keriso, o tagata uma ia ua agavaa i le tofi masiofo. O tagata uma ia ua valaauina e fai le galuega faaola, e faaolaina ai agaga o nisi tagata, e pei ona faia e Eseta ma Moretekai, e pei foi ona fai e Peteru ma Ioane.

O le faamalologa o le pipili, o se vavega na tupu i le ulua'i Ekalesia. Ua aumai e Luka e fai ma fafagu i le galuega faaola a le Ekalesia i aso nei. Ua aumai e faatupu ai ni vavega i o tatou foi taimi, i a tatou foi Ekalesia.

Aua ua fai le pipili ma ata faata'ita'i o le toatele o tatou tagata lotu ma tagata Ekalesia. E o i le malumalu i aso uma, ae gata mai i le faitoto'a poo le faapaologa lo latou malosii ma lo latou faamoemoe. Ua fai le malumalu mo latou aiga e fiafia iai. E le ona e fesoota'i ai ma le Atua, ma mafuta ai ma lona Agaga, ae ona e fia feiloa'i ai ma isi tagata ma faatoga i ai. E le ona o le sailiga o manuia faaleagaga, ae o manuia faaletino. O le gasegase pipili lea e fia faaola.

Ua tatou vaaia ai foi i le pipili, le ata o se Ekalesia, o loo tauamo ai e le toatele le mamafa o le toatasi, poo le toaitiiti. Ua fai ifo lana misiona ona ua faamamafa le itu i fafo. A o se Ekalesia ua gata lona malosii i mea na fanau mai ma ia, o mea ua masani ai talu lona amataga. Ua manatu ua lelei le mea o iai. Ua le toe mafaufau i se

## ITULAU MO TUPULAGA TALAVOU

### Valaauina mai luga o le nofoa solofanua

Sa fiafia tele le tasi alii talavou i lana galuega o le tietie solofanua tutuu. O le tele lava o tuuga e mua ai lana solofanua. Ua atili fiafia lenei alii ina ua sii lona totogi. Ua amata foi ona tuu tasi lona mafaufau i lana galuega. Peitai ua avefaa ma ala ua tau faavesivesi ai lenei aiga. Ua tau le maua se mafutaga ma lona toalua ma lana fanau. E usu i le taeao, sau ua po. Tele taimi ua alu i lana galuega. E oo foi i mea faale-lotu, ua tele ina le auai i sauniga lotu i Aso Sa, aua ua faigaluega ai foi.

Ai sa iai se fuafuaga a lenei alii

e fia fai ma misionare o le Tala Lelei. Ua uma foi la ona talanoa i lona toalua, aemaise lana faifeau, e uiga i lea faamoemoe.

Ae iai le mea na tupu i le tasi aso ina ua faasalalau mai se tasi tuuga tele, e maoae foi se tupe e maua e le solofanua e mua. Ona tapena lea o lenei alii i lenei tuuga. Sa tapuai lelei foi le tina e oo lava i si fanau.

Oo i le aso o le tuuga, ua nofo le tina mai lana galuega, ua le o tamaiti i le a'oga, a ua aga'i atu i le malae e tapuai le tuuga a si o latou tama.

Sa mate uma tagata i le solofanua a le alii lenei. Sa vaaia foi le mua mai o lana solofanua ina ua amata mai le tuuga. Ina ua lata lava i le

tini ae faateia tagata i le pa'u faafuase'i o le solofanua a le alii lenei.

Sa laulaututu tagata ma le le fiafia, aua o le manu lea na peti uma iai. E lei maua se tulaga o le uso lenei. A o le mea e ofo ai, e leai se mea e ono see ai le vae o le solofanua.

Ina ua tu a'e i luga lenei alii, faapea lana upu - Faafetai i le Atua mo le feau ua ou maua, o lea ua e valaau au mo le galuega tala'i i luga o le nofoa solofanua. Ua ou faamavae ma lenei galuega, ua ou fia aoga mo le Atua.

E ese auala a le Atua ma lona valaauina o tatou. O le mea taua ia tatou iloa lo tatou valaauina. Aua le faataligatuli, ae talia le valaau mai - e fai oe ma ana mea faigaluega.

Aua pe se a le aoga, e te maua ai le lalolagi, ae maumau ai lou ola

Rev.Limuaa P. Samuelu

*faaauau itulau e sosoo ai*

isi laasaga fou. E popole ma fefe e soona fai ni suiga. I le ma se Ekalesia o loo faalagolago tasi i le fafaga mai a le leoleo mamoe. O le a le mea e aumai, ona pau foi lea o le mea e ave i le fale. Ua leai sana ia lava taumafaiga, mo se faasiliga mo lona lava agaga. Ua leai foi sona sao i le galuega faaola, ua na o le fiaola.

O le ata manino foi o le galuega mo tupulaga; e leai so latou leo ma se avanoa e tali mai ai. Afai lava e le finagalo le aposetolo e fai se galuega, se a'oga poo se polokalame, na o le feseeta'i solo faapipili o tupulaga. A o le ala foi lea ua saili solo ai au tupulaga ma faatoga mo mea e maooa ai agaga, ona ua tele ina tuulafoa'iina.

Ua mana'omia se vavega e toe faaolaola, faafou ma toe fuata'i ai le galuega a le Ekalesia. E iai mea o loo faapipiliina le faatuatua o ou tagata. Poo le faiga o au tapuaiga, poo au galuega fai. Poo au tulafono ma faiga faavae. E tofu

le Ekalesia ma mafuaaga ua pipili ai. E ao ina tatou asiasi iai. 'Aua le pei o le ositaulaga ma le Sa Levi. E ao ina matua pulato'a iai e pei o Peteru, ma matua tago atu iai le lima taumatau e faatu i luga, e faaola.

O le tala fiafia a Luka, e mafai ona tupu le vavega. E mafai ona toe savali, ma oso, ma vivii i le Atua. E mafai ona toe fuata'i le galuega faaola a le Ekalesia. E mafai aua o le suafa o Iesu Keriso le Nasareta, o le suafa e iai le mana ma le pule uma lava.

E mafai ona tupu pe afai e iai ni aposetolo e pei o Peteru ma Ioane, e alolofa moni i le Ekalesia. Ni aposetolo la te faaoga tatau ma faaoga lelei, ma ofo atu le meaalofo e tasi sa ia i la'ua, o le suafa o Iesu Keriso. Ua la talitonu, o le mea na fai ai i la'ua ma aposetolo - ona o se aso faapenei.

Ua molimau tagata i suiga tetele ma le ofoofogia. Ua ulufale faatasi le tagata fou, ma Peteru ma Ioane,

i totonu i le mea e tapua'i ai. Ua le toe iai se tuu eseese, o e i fafo mai e i totonu. O le tagata sa ola faalagolago i isi, ua mafai nei ona ofo atu lona ola e faaola ai nisi tagata.

O le vavega i fesuaia'iga e mafai ona fai i le mana o Iesu Keriso. E faaosofia i le lagona faafetai, ina ua faaolaina i le alofa tunoa o le Atua. Ina ua saofaga i le maota, ua pale i le palealii, ma ua avefaa masiofo, ua fai ma mea faigaluega a le ana le Ekalesia.

Ua ia auauna mo le na ia muamua faatino le galuega faaola mo i tatou uma, e ala i lona maliu i luga o le satauro, ma ua toetu manumalo mai le oti ma le tuugamau.

Ia ia te ia le viiga e faavavau. Amene.

*(O lenei lauga na faia i le sauniga masani a le TVOne i le afiafi o le Aso Sa, 8 Fepuari 2009)*

## A Page for Youth ITULAU MO TUPULAGA TALAVOU

### Galuega faa-misionare a le lagoon

Sa masani le tasi alii ona faitio i lauga a le latou faifeau. Fai mai lana tala, na o le ote ma avaavau mai i le pulelala. E le saunia ana lauga, o le mea lea ou te le toe fia faalogo lava iai.

Oo i le tasi aso ua fai le polokalame a le autalavou i fafo i luma ane o le fale o le faifeau. Alu loa le alii lenei e fia matamata tau atu i le 'ulu i tafatafa o le malae 'a'e ai loa e matamata ifo ai i le

polokalame a le autalavou.

A oo ina saunao le faifeau tapuni taliga o le uso, e le fia faalogo i le faifeau. Sei oo foi i le taimi e pepese ai le aufaipese, ona aveese lea ona lima sa tapuni ai ona taliga.

Ina ua toe saunao le faifeau, ae tapuni foi taliga o le uso i ona lima. Lele atu loa le lagoon tu i lona isu, aveese loa ona lima ma ona taliga e po le lagoon, ae lagona atu le faifeau ua faapea mai, O outou uma e le

fia faalogo, ia matua faalogo mai nei. O outou ua iai taliga e faalogo ai, ina faalogo mai ia, tou te ola ai. Faafetai i le galuega a le lagoon, ua faaavanoa le faalogo a le uso faitio. E aoga mea uma na faia e le Atua, e oo lava i iniseti laiti.

Aua e te faitio i lauga a faifeau, o auauna faauuina a le Atua. Na tapenaina faapitoa i latou mo lenei galuega.

O le tiute lava o le faifeau, e fagufagu atu, e lapatai atu, e faamalosia'au ina ia manuia ma maopoopo le galuega. Ae ia taufai tatalo le Ekalesia mo le galuega a faifeau o le Tala Lelei.

Rev. Limuaa P. Samuelu

## O Tagata 'aisi, ma le tamaloa i le paka i Tavisitoki - Lonetona

E le taumate e oo foi ia te oe le mea e oo soo ia te au. O lo'u faaletonu lea pe ave se tupe ma le o 'aisi mai ia ta ita i le taulaga i Apia, pe leai.

O le mafuaaga, o le vaai atu lea, o nisi o latou, e malolosi. E le foliga mama'i. E foliga mai o loo mafai lava ona latou faia ni galuega e su'e ai ni a latou meaai. Pe fesoasoani foi i le atiinaeina o le aiga i le galue lea i fanua o lona 'aiga. O le isi foi itu, ta te iloa lelei lava nisi o latou ia. E le leaga o latou mafaufau. E lelei foi 'aiga e o mai ai nisi o latou.

E le afaina ia te a'u le tagata e leaga lana vaai, pe po le vaai, pe tauaso foi. Aua ua ou matauina, e fai le galuega a le tagata tauaso, e saili ai se fesoasoani mo ia. E le na ona nofonofo ma 'aisi. E fai le galuega, o le faatau nusipepa. O le tagata la lea e faigofie ona ou fia fesoasoani iai.

O le faalavelave lava ia tatou nei o Kerisiano, ona o le a'oa'oga a Iesu ina ia tatou alolofa i le lua te tuaoi, e pei o oe lava ia te oe. Ma le faata'oto na fai e Iesu: "'Aua na ou fia 'ai....'"A le avea nei se mea i le tagata lea e

foliga fia'ai ma foliga mativa ma foliga leaga ona ofu, ae te'i ane, o se tagata ua tuu ai foi iina e tofotofoina ai ta ita, ona iai lea o le faaletonu.

Ae faapefea pe a te'i ane i se taimi o le po o fai mai se leo: 'Aua o a'u le tagata lea na nofonofo i luma o le fale o Amau ma 'aisi atu ia te oe ona o lona fia 'ai, ae te le'i avane se tupe poo se meaai ma ia?'

E lu'i pea a'u e le faata'oto lea a Iesu pe a ou vaai i tagata ia e 'aisi i poletito o faleoloa i Apia. Aua foi, a fai fai pea ona ave iai o tupe, ona tumau ai lava lea o le le alu e fai se galuega e maua ai se fesoasoani mo ia. O le a tatou faaauau pea ona fa'aamio ai pea lea tagata i le ola faalagolago i le 'aisi, e maua fua ai ana mea, ae le alu e fai se galuega.

O le tausaga e 1974, ou te nofo i le potu a'oga i Lonetona, ma ou vaai pea lava pea i se tamaloa, e usu atu i le taeao, ma tu tu i le isi ituala o le alatele, i le *footpath*, poo le ala e savavali ai tagata i le alatele. E tu tu ai lava i le aso atoa. E fai lona peleue e foliga mai e le'i taina lava. E masae le isi itu o le peleue. O ona seevae ua

matua leaga lava. O lona pulou 'ie e le iloa le tausaga na faatau ai.

Na o le tu tu lava o le tamaloa i luma o ana fasi pepa, o tusi ai ni upu, ma faapii i le pa-u'amea o le Paka o Tavisitoki, (Tavistock Square). A o ona luma, o iai se tama'i pusa pepa, e o atu tagata e alolofa i le tamaloa, ma tuu iai tupe.

O le auala lea e tele ina ui atu ai solo tetee e aga'i i Trafalgar Square i le moa o Lonetona.

Na oo ina ou alu ma ou faitauina upu o loo tusi i fasi pepa a le tamaloa. Fai mai nisi o ana upu o tusia i pepa: 'No more suitcase bombs! Find the killers of our little girl! Show your support by joining our march to Trafalgar Square!'

Pe na o le sefulu ni fasi pepa a le tamaloa. Ae tu tu ai lava i le aso atoa, tusa lava pe timu, se'ia oo i le tusa o le tolu i le afiafi, o'u vaai atu, ua tase'i ana fasi pepa ma teu, ave ma lana atigipusa ma alu. Oo foi i le taeao, toe usu atu faapii ana fasi pepa, ma toe tu tu ai foi i le aso atoa. A timu, ona fai lea o lona ofufaaia e fai le pulou, ma tu tu ai lava.

Ou te fo'i mai i Samoa ina ua uma le a'oga, o iai lava le tamaloa lea i le mea lea. Usu atu i le taeao, faapii

faaauau itulau e sosoo ai

## A Page for Youth

# ITULAU MO TUPULAGA TALAVOU

### O Tagata 'aisi, ma le tamaloa i le.....

ana pepa, tu tu ai, oo i le tolu i le afiafi, alu.

E taua ia te au le galuega a le tamaloa lea, e ui lava ina foliga faatauvaai na ana fasi pepa, ma ana upu o tusia ai. Ae o le mea sili, o loo fai se galuega, ae le na o le nofonofu ma 'aisi se tupe mai tagata feoa'i ane.

O le toatele o i latou ia o loo 'aisi i Apia, e na o le nofonofu lava, pe feoa'i solo foi ma 'aisi. Se'i ta foi se kitara e pei ona fai e isi i isi atunuu. Pe ili se faailigutu (mouth organ). Pe tusitusi ni ata. Pe fai se aufaipese e ta le kitara ma pesepese malie, ona o atu lea o tagata ma faalogologo iai ma

fiafia ma lafo iai ni a latou tupe. Pe si'a se afi i le laau o le fu'afu'a pe a tumu ni turisi e fia matamata ai. Pe lalaga se 'ato i le launiu ae se'i matamata iai le anoano o tupulaga ua le 'ilafia lalaga se 'ato i nei auga tupulaga. Ae leai; e na o le nofonofu lava ma 'aisi ma le faamoemoe ia maua fua le tupe.

Ua faigata ona tatou iloa poo fea tonu tagata mafatia moni, fia 'a'ai ma fia maua se fesoasoani, ona ua filo faatasi ma i latou ua maua i le paie ma le augata e galue ma o mai ua faasese pe faasee tagata.

O le a'oa'oga a Iesu, ia tatou fua mai; fua tele mai; fua tele mai atili. O le a'oa'oga mo Kerisiano ina ia ola galulue.

E le maua se mea lelei i le na ona nofonofu ma 'aisi, ae le faia se

galuega. O le finagalo o le Atua mo tatou Kerisiano, ia tatou galulue, ma faaoga le eleele na ia faia. Faaoga ma le poto ma le faautautaga na ia faia mo tatou tatou te ola ai i lenei lalolagi. Toto fa'i i le eleele lea, toto talo; toto ufi; toto esi; toto kukama, pi, tamato, taamu, mago, maukeni, kapisu ma le anoano o mea ua tuuina mai e le Atua mo tatou. Ona tatou matamata lea i lo latou tutupu a'e, ma matua, ma tatou seleseleina, ma tatou maofa ai pea i le mana o le Atua Silisiliese na faia i tatou, ma mea uma tatou te tua i ai i aso uma o lo tatou ola.

O le eleele lava, ma le sami, le faleoloa o le Atua tatou te tua iai, ae mana'omia lo tatou totoina, pe fagotaina. O le tatou pito laau lena. Ua tuu mai e le Atua. Tatou o la'ia e galuea'iina ma faaoga le anoano o oloa e maua mai le eleele ma le sami na aumai e le Atua mo tatou.

A.T. Apelu Aiavao.

### Mai le Tusi Paia:

\*\*\* Ua tu'inanau le loto o le paie, ae leai se mea e maua; a o le manao o e filiga i galuega e matua ma'ona ia.

\*\*\* O le tagata mafaufau na te ufiufi lona poto; a o loto o e valelea, e faalaua'itele lo latou valea.

\*\*\* O mea nei e ono ua inosia e le Alii; o lona fitu foi ua matua inosia lava e ia; o mata faasiasia, o

le laulaufaiva pepelo, ma lima e sasaa le toto o le ua le sala, o le loto e manatunatu i togafiti leaga, o vae e tele vavave ona taufetuli i le leaga, o le molimau pepelo, na te tautala i mea pepelo; ma le na te faatupu maseiga i uso.

\*\*\* Lo'u atalii e, afai e te talia a'u upu, ma e teu i lou loto a'u poloaiga, e ua'i atu ai ou taliga i le poto, e faasaga atu ai lou loto i le

faautauta; afai lava e te valaau atu i le atamai, ma e leo tele atu i le faautauta; afai e te sailiili ia te ia, e pei ona sailiili i le ario; afai e te susesue i ai, pei ona susesue i le oloa lilo; ona e lagona ai lea o le mata'u i le Alii, ma e maua ai le poto i le Atua. Aua o le Alii na te foai mai le poto; mai lona fofoga le poto ma le faautauta.

### From the Bible:

\*\*\* He that tilleth his land shall have plenty of bread: but he that hath followeth after vain persons shall have poverty enough.

\*\*\* He that is of a proud heart stirreth up strife: but he that putteth his trust in the Lord shall be made fat.

\*\*\* Whoso keepeth the law is a wise son: but he that is a companion of riotous men shameth his father.

\*\*\* If thine enemy be hungry, give him bread to eat; and if he be thirsty, give him water to

drink.

\*\*\* Rejoice not when thine enemy falleth, and let not thy heart be glad when he stumbleth.

\*\*\* Hearken unto thy father that begat thee, and despise not thy mother when she is old.

\*\*\* Buy the truth, and sell it not; also wisdom, and instruction, and understanding.

\*\*\* Every way of a man is right in his own eyes: but the Lord pondereth the hearts.

\*\*\* A foolish son is a grief to his father, and bitterness to her that bare him.

\*\*\* He that is slow to anger is

better than the mighty; and he that ruleth his spirit than he that taketh a city.

\*\*\* There is a way that seemeth right unto a man, but the end thereof are the ways of death.

\*\*\* The name of the Lord is a strong tower: the righteous runneth into it, and is safe.

\*\*\* Love not sleep, lest thou come to poverty; open thine eyes, and thou shalt be satisfied with bread.

\*\*\* The just man walketh in his integrity; his children are blessed after him.

# O le Teine Faatali Taavale i le Pogisa - ma le Faata'oto na fai e Iesu

(a short story)

O taeo uma lava, i le ta o le itula e fa i le vaveao, ou te alu ai e aumai la matou tiliva falaoa mai le falefalaoa i Fasitoo. Ou te alu atu i Aleisa Sisifo, ma ou ui atu i se tasi o "alagalue" o nisi o alalafaga i Aana, lea e sau mai Aleisa aga'i i tai i le alatele mai Apia ma aga'i atu i le Malae Vaalele i Faleolo.

O le isi vaveao pogisa, ou te oo atu i se tasi o magatolu ou te afe ai aga'i i tai, ae taofi mai la'u taavale e se teine, pe tusa o le 23 ona tausaga. E faatautau lona lauulu uumi. E pae faa'umi'umi, o loo ia ofuina se ofu samasama vaivai, e iai foi le fusi o se ie lanumumu, e fusi i lona puimanava ma faatautau i lalo pito. O le teine foi, ou te le'i vaai lava iai muamua.

O la'u amio, e sea sea ona ou le avea ni tagata i "alagalue" ia, ona ta te alofa iai ona o le mamao tele i tai o le alatele mai Apia i Mulifanua. O le isi mea, ona o le a'oa'oga lava lenei a Iesu, pei ona ta'ua i se tala o loo lolomi atu i le pepa lenei, nei tei ua le avea se isi, ae te'i ane, o se agelu.

Na ma o ma le teine, ae ou masalosalo lava, pe se teine mo'i, pe leai, ona o le itula e fa i le vaveao lea na tu tu to'atasi mai ai le teine ma taofi la'u taavale. O le vaega foi lea o le auala, e leai ni fale e latalata atu iai. O le mea lea na oso ai lava lo'u masalosalo i le tu tu to'atasi mai o le teine i le pogisa. O le tatou masani foi, e iai lava se tagata matua e toalua ma se teine, a oso i le pasi, ona foi lea o le tagata matua i le fale.

Na tau faapa'i lo'u tulilima i le teine, sei iloa ai, pe iai mo'i se tino o le teine pe leai. Na tau oso foi lo'u fia tago i lona tuli, poo iai mo'i se tuli pe leai. O lea e tau tutu moge o

lo'u tuavaa i lo'u fefe ae te'i ua fai mai ia te a'u: "E te le fefe i sau na o oe i le pogisa? E te le'i fefe i piki a'u?"

Ua atili ai ona ou faafefefefe i le fesili a le teine, aua o lea foi ou te tau fesili a'u pe le fefe i tu tu na o ia i le pogisa. Ou te faalogo atu i lo'u tino i le taimi lea, pei a sau so'u afu malulu, ma oso so'u faamaalili. Ona ou faamalosi lea ona ou tali lana fesili i la'u foi fesili: "Ae faapefea oe, e te le fefe i faatali taavale na o oe i le pogisa i le togavao?" Ae 'ata ma fai mai, "A 'e le fefe ou te le fefe fo'i. O le mea sili o lea ua ta to'alua. Ua ou matauina o le taimi lava lenei e sau ai lau taavale. Ua ou matauina foi, na o oe lava e te sau ae leai se isi lua te to'alua. Ua ou matauina foi, e te avea lava tagata o lo matou nuu e fia o i tai i le aai. E ese lou agalelei i tagata." Ona alu ai lava lea o le ma taavale, ua

tau le talanoa se isi. Ae ua ou nofo faamalo lo'u tino i lo'u faafefefefe. Ou te iloa a na tago mai le teine ia a'u i le taimi na ma o ai, e malepe le faitoto'a o le taavale i sa'u oso i fafo ma faaitaio - 'Auoi ta fia ola!'

Na ma taunuu i tai i le alatele e faatali ai sa na pasi mo Apia. Na ou tau fai iai ina ua oso i lalo, "Toe feiloai!" Ae na toe taofi la'u tala, ne'i te'i ua ou toe alu atu i se isi vaeluapo o toe tu tu mai foi le tamaitai na o ia ma faatali mai le alu atu o la'u tiliva falaoa.

Na ou alu ma ou mafaufau lava i le teine. Pe se teine mo'i, pe se agelu; poo se tagata ua tuu ai iina, e tofotofoina ai a'u e le Alii na faia le faata'oto, pe sili atu so'u alofa i le teine faatali taavale i le pogisa, pe sili so'u fefe pe se tagata poo se temoni. Na ou mafaufau, o le mea sili, na tu la'u taavale, ma ave le teine.

Aua o ai na iloa, pe le o le Alii foi lea ua tu tu mai i le pogisa, faa-teine lalelei, e fusi lona puimanava i le ie lanumumu, ma faatautau lona lauulu uumi, ma taofi mai la'u taavale?! Ne'i le avea ae te'i foi ua fai se isi faleaitu a le soga'imiti tafitifiti i le televise ae sau se leo: 'O a'u le teine lea na tu tu atu i le magaala i le pogisa, ae le'i tu mai iai lau taavale ona o lou fefe vale!'

A.T. Apelu Aiavao

## AROUND THE CHRISTIAN WORLD

### At last, Blair is free to 'do God' - and America loves it

By Leonard Doyle in Washington  
Friday, 6 February 2009

Tony Blair, former prime minister of Britain, gave an extraordinary speech about the global importance of religion yesterday, (Friday, 6 February 2009), telling an audience which included the new-inaugurated President, Barak Obama, that faith should be restored "to its rightful place, as the guide to our world and its future."

The former prime minister also said he believed the 21st century would

be "poorer in spirit" and "meaner in ambition" if it was not "under the guardianship of faith in God." He had been invited by President Barak Obama to lead the prestigious US National Prayer Breakfast, a spectacular event in the ballroom of the Washington Hilton Hotel.

"It is fitting at this extraordinary moment in your country's history that we hear that call to action; and we pray that in acting we do God's work

*cont. at top of next page*

and follow God's will," Mr Blair said.

Mr Blair also delivered a homily about faith and religion, even telling the assembled political leaders of his first spiritual awakening, when he was 10 years old. "That day, my father - at the young age of 40 - had suffered a serious stroke," he told the audience. "His life hung in the bal-

ance." He described being sent to school where his teacher knelt and prayed with him.

"Now my father was a militant atheist," Mr Blair said. "Before we prayed, I thought I should confess this. 'I'm afraid my father does not believe in God,' I said. 'That doesn't matter,' my teacher replied. 'God

believes in him. He loves him without demanding or needing love in return."

Mr Blair's homily went down like milk and honey. Americans proudly wear their faith on their sleeves and Washington is a city where politicians and policy-makers are often found at early morning prayer meetings.

## Vatican tells bishop to retract Holocaust statement

Reporting by Madeline Chambers  
Wed Feb 4, 2009

BERLIN (Reuters) Germany's Central Council of Jews welcomed the Vatican's decision to order a traditionalist bishop who denies the Holocaust to recant on Wednesday, saying it could lead to a resumption of ties with the Catholic Church.

Charlotte Knobloch, president of the Council of Jews, said the Vatican's move was a positive signal and a re-

action to German Chancellor Angela Merkel's demand for clarification after Pope Benedict sparked outrage over his rehabilitation of the bishop.

"It is a first step which could lead to a resumption of dialogue with the Catholic Church," said Knobloch in a statement which struck a conciliatory tone after she said last week she was breaking off ties with the Catholic Church.

She had been angered by the German pope's rehabilitation of Bishop

Richard Williamson, who denies the extent of the Holocaust in which Nazis killed six million Jews, and that of three other members of the ultra-traditional Society of Saint Pius X (SSPX).

Knobloch also welcomed the Vatican's statement earlier that SSPX must accept all the teachings of the Second Vatican Council, which urged respect for Judaism and other religions.

"That would mean the brotherhood would have to publicly retract their statements that Jewish citizens are murders of God, and to firmly condemn every form of Holocaust denial," Knobloch said.

## The priorities of a Christian country

**Telegraph View:** The state has diminished and marginalised the role of Christianity in British life.

14 Feb. 2009

Although many state officials seem determined to forget it, Britain still has a state religion. It is Christianity, the faith that has been the basis of government in this country for centuries. The Bible is still the book on which most politicians place their hand when they take the oath of office, and Christian values of charity and justice are still fundamental to most British people's conception of a good society.

That is why the stories that we publish today are so surprising, for they suggest that there is a concerted attempt by some officials to marginalise and to diminish the Christian faith. Head teachers who merely attempt to ensure a Christian element to their morning school assemblies have

faced concerted criticism. A survey of the Church synod has revealed that nearly two thirds of the Synod's members believe that Christians face discrimination at work because of their faith.

What is going on? How can a Christian country get to the position where the effect of some of the Government's policies is the persecution of Christians? The short answer is that, for many state officials, the most important goal is to avoid offending any religious sensibility *except* Christianity. The effect has been to introduce policies which sanction curtailing, or even forbidding, the expression of Christian belief, for fear that those of other faiths will be "offended".

This is seriously wrong. Religious toleration - a central Christian value in this country since the 18th century - means tolerating other faiths. It does not mean caving in to the aspiration

that some of the adherents of those other faiths have to be the dominant religion. Christianity is and should be in a privileged position in Britain. That does not mean that other faiths are disadvantaged or discriminated against. It is simply a recognition of the legacy that has made us what we are.

**Editor's Note:** *The Telegraph* is one of Britain's top newspapers.

**Onward, Christian soldiers,  
Marching as to war,  
Looking unto Jesus,  
Who is gone before:  
Christ the royal Master,  
Leads against the foe;  
Forward into battle,  
See, His banners go!**


*Onward, Christian soldiers,  
Marching as to war,  
Looking unto Jesus,  
Who is gone before.*

## O E UA MALILIU

### Faalavaau Taefu Vili

27 Fepuari 1946 - 4 Tesema 2008

O le tiakono, failautusi o le aulotu i Siufaga ae na tuumalo faafuasei ona o se mai oso. O ia o se tasi o tama matua o le Ekalesia ma le nuu sa ia te ia se taleni kamuta na fai ma faamama avega i le fausiaina o le malumalu,



hall, fale o le faifeau o le aulotu. Na ia fesoasoani foi i le fausiaina o le faleaoga o le A'oga Tulagalua, falea'oga faata'ita'i, faatasi foi ma maota ma laoa o leni nuu.

Sa filifilia foi o ia i nisi o komiti e pei o le komiti taulaga, komiti o le

### Motumotu Taefu

18 Oketopa 1932 - 13 Tesema 2008

O se tasi leni o tina matua o le aulotu i Siufaga, ua leva ona gasegase ma saili togafiti. O se tina loto tele a o feagai ma ona mafatiaga i mai o le tino.

E ui o se tina lima vaivai ae na molimauina i lona soifua galue le leai o se mea e solomuli ai i lana tautua i le finagalo o le Atua.

O le taimi mulimuli ina ua tigaina i le falemai o T.T.Meaole sa ou asiasi atu i ai a ua le mafai ona toe talanoa mai. O le aso lava lena ina ua ou tuumuli ese mai i la'u asiasiga ae

### MATAVAO TIMOTEO

15 Aokuso 1959 - 26 Setema 2008

Matua: tama: Maugaitoga Kalati, Lalomanu; tina: Selau Tupuola o Saaga Siumu.

Na faaiipoipo atu ia Timoteo Isaako

alofa, komiti suesue itupa o tama.

O se tiakono faatuatuaina i le Pulega a Falelatai ma Samatau, ma na ia tauaveina foi le komiti o atinae i le Matagaluega a Aana mo ni tausaga se 3.

O ia o le pulenuu ma o le tama e lelei lana tofa, lagolago malosi i le galuega faa-faifeau i le faamaopoopoina o tapuaiga, ma e faaaloalo ma tautua faamaoni i le galuega a le Atua.

O ona sauniga faale-aiga i le Aso Lulu 17 Tesema 2008 i Siufaga, sa ou taitaia ma faia le upu faamafanafana mo le tina, fanau ma le aiga.

Sa ou ta'ita'ia foi lona toe sauniga i le aso na sosoo ai, sa lauga le faifeau ia Misiperetiso Ivara, molimau le tina ia Litia ma sui o le aiga ma le nuu faapea foi i la'u molimau i lona soifua faale-agaga.

Faaiu atu i lona toe sauniga i lona oliolisaga tumau i lona maota i Matagiagimalie i Siufaga lava.

"Amuia lea auaua ua maua mai e lona Matai o loo faapea ona ia fai."

Rev. Opapo Soana'i Oeti

valaau loa le Atua ma faamanava ana feau ma malolo mai ona mafatiaga i gasegase sa feagai ma ia.

O ona toe sauniga i le malumalu i le aso 13 Tesema 2008, sa ou taitaia le sauniga ma le upu faamafanafana a o le Susuga i le Fesoasoani Katoliko ia Leusu Ioane sa tatalo, molimau foi nisi o le fanau faatasi ma la'u molimau i lona soifua faale-agaga.

Faaiu i lona toe sauniga tau mavae i lona oliolisaga tumau i lona aiga i Siufaga lava.

"Pe ola pe oti i tatou, o tagata lava o le Alii i tatou."

Manuia lau malaga tina.

Rev. Opapo Soana'i Oeti

i le aso 15/6/1995. O le aso 31/01/05 na faapaia ai lo la tofi tiakono.

O se tasi o tina galue o le Ekalesia. O le matauga i leni tina, o se auaua e ola finafinau. Ma e foliga o le malosiaga lea o le tama ia Timoteo ma le aiga i soo se mea, aemaise le faaaogaina o i laua mo le galuega o le

Tala Lelei. E galue malosi, ma o se tasi foi o tina sa faamoemoeina i nisi o galuega fai a le Mafutaga a Tina o le Ekalesia.

Na faata'otolia o ia i se gasegase faigata. Sa saili togafiti, na sii ma'i atu foi i le maota gasegase i Motootua,



peitai na siliga foi taumafaiga alii ma tamaitai fomai. Na valaau lona Matai i le aso 26/9/2008, a o taoto pea o ia i le falemai.

O ona toe sauniga na faia lava i le malumalu i Saleaamua. Sa auai nisi o le afaigaluega ma le Susuga i le Toeaina ia Isaia Tiatia, o ia foi sa saunia le upu faamafanafana. Na molimau le tama ma sui o le aiga, ona faaiu atu ai lea i sauniga faamavae i lona oliolisaga tumau.

E momoe pea ma manu e le fati, ae sau mala e atia'e. Peitai e ui lava ina motusia le mafutaga mafanafana ma le tama aemaise le nofo a alo, ae o loo mafanafana pea le pa'i mai o le mana o le Agaga o le Atua i ona tagata faatuatua.

Ia manuia lau malaga.

Pati Vili

### LOTUOLA FOGAVAI

10 Ianuari 1925 - 14 Iuni 2005



Matua: Tama: Fogavai Mataafa (Saleaamua). Tina: Seesei Lutau Peia (Lalomanu) O se tasi o tina e tumu i tamaoiga ma meaalofa a le

## O'E UA MALILIU

Atua, e ala i lana faasoa i fautuaga ma tima'iga aoga aemaise o lana faamalosiua mo le galuega. E fiafia e tautua i le Atua e pei ona fai ma vaisu a soo se Kerisiano e faatuatua. Na ma taunuu mai ua le mafai ona auai i tapuaiga ma galuega fai a le Ekalesia ona ua le talafeagai ma lona malosi. Peitai sa le taofia ai lona fia galue pea mo le Atua, i soo se itu e ala i le Mafutaga a Tina.

E mafanafana lana faasoa ma le faala'ei'au faa-tina i le faifeau i taimi o asiasiga. Ma o se tina e tumu i le alofa i le aufaigaluega, aemaise o le loto foai mo le Atua i soo se tulimanu o lana Tala Lelei.

Sa feagaiga le tina ma ni gasegase faigata, ae sa matauina pea lona tumau i le faatuatua, seia oo ina valaau lona matai a o taoto i lona aiga lava i Saleaamua i le aso 14 Iuni 2005, ua 83 tausaga o lona soifua.

O ona toe sauniga sa faia lava i le malumalu i Saleaamua. Sa auai nisi o le aufaigaluega a le pulega, ma le Susuga i le Toeaina ia Asotasi Time, sa ia saunia le upu faamafanafana. O le fanau lava sa molimauina le soifua aoga o le tina i totonu o le aiga ma le nuu.

Na faaiu i ona sauniga faamavae i le tuugamau na ou taitaia, ma faatofa ai loa i le tina i le pese masani. Talofa uso e.....ia manuia le malaga.

Ia faamanuina le suafa o le Atua ona o le soifua aoga o lana auaua.

Saunia: Pati Vili

### Tepatasi Matila Kalati

23 Novema 1925 - 4 Febuari 2008

Matua: Tama: Mose Mose (Saleaamua)  
Tina: Eleni (Elaine) Chritchon (Sataua).

O le tiakono o le Ekalesia i Saleaamua. Na faaiipoipo ia Peleiupu i le tausaga e 1975. O le tausaga foi lea na faaee atu ai lo la tofi tiakono, a o galue le faifeau o Uili Seaga.

O se tiakono galue malosi, faamaoni ma galue fiafia i le atinaeina o le galuega i soo se itu. Ua tele tausaga o lana tautua ma le auaua. E tumu i meaalofa ma taleni mai le Atua, na te faaoga tatauina foi ia taleni e atiae ai lona aiga le nuu aemaise le Ekalesia. E manatua pea lenei tama e le gata i lana tautua, a o lana faamaopoopo ma le lagolago i le tau atinaeina o le tele o itutino o le Ekalesia e ala i le aufaipese, le A'oga Aso Sa ma

le Autalavou. E tumu i le alofa ma le loto foai mo le Atua ma lana Tala Lelei.

Soo se tama lelei na te taitai ma faasino lana fanau ma lona aiga i le ola auaua aemaise le soifua tapuai i le Atua. O lana foi lea vaisu.

I lo ma taunuu mai i le Ekalesia, e faalua ona filifilia e fai ma komiti na te tausia le galuega i ona itu uma e ui ina ua matua



lona soifua. E le aofia ai lana auaua i le tausaga e tele ua mavae ua le mafai ona maua i le tala o le galuega.

Na faataotolia le tama i le amataga o le tausaga 2008 i lona gasegase, sa saili togafiti foi peitai ua siliga tali i seu. Na valaau le Atua i lana auaua i le aso 4 Febuari 2008 i lona aiga lava i Saleaamua ina ua 83 tausaga o lona soifua. E manatua pea le tama i le tele o ana galuega ua faia mo le Ekalesia.

Sa faia lava ona toe sauniga i le malumalu o le Ekalesia i Saleaamua. Sa taitaia lea e le Susuga i le Toeaina o Isaia P. Tiatia ma le aufaigaluega o le pulega. O le upu faamafanafana sa saunia e le Susuga ia Asotasi Time F.T. Na molimau le fanau, ona ou faaiuina ai lea i le sauniga faamavae i lona oliolisaga tumau. "Amuia le auaua e maua mai e lona matai, o loo faapea ona fai."

Talofa, uso e tofaina oe. Ua sau le itupo e malolo...ia manuia lau malaga. Ia viia pea le suafa o le Atua e toatasi ona o le soifua aoga o ana auaua mo lana tala Lelei.

Saunia: Pati Vili

### Tulasunu'i Uege Moenoa

25 Ianuari 1937-29 Novema 2008

Matua: Lualua Ki. Tina: Avalua

Na faaiipoipo ia Sepoima o Saleaamua i le aso 3 Novema 1993. O se tama, ua loa foi tausaga o lona soifua tautua i le Atua e ala i lona tofi tiakono. Sa galue i le aulotu i Motootua. Sa galue foi i le Ekalesia Faapotopotoga Kerisiano i Amerika Samoa i Fagatogo mo ni tausaga.

O le aso 30 Oketopa 2001 na talia ai lo

la tofi tiakono ma faaogaina i le Pulega a Aleipata, ina ua faamaonia i se tusi sa tauaaoina mai le Matagaluega a Apia i Sisifo.

O le tama foi sa fiafia e foai ma tautua i le galuega a le Atua e ala i lo la tofi. Sa molimauina foi lona alofa i le faifeau ma lona aiga ina ua faatoa taunuu mai e galulue i le Ekalesia.

Na faata'otolia i ni gasegase faigata. Na sii ma'i atu i Motootua, peitai sa le faamanuina taumafaiga a alii ma tamaitai fomai. O ona toe taimi, sa taoto ai lava i lona aiga, lea na valaau ai le Atua ma faamanavaina ai ana feau i le aso 29/11/2008.

Na taitaia e le Susuga i le Toeaina ia Isaia Tiatia ma le aufaigaluega o le Pulega ona toe sauniga. Na molimau le tina ma nisi o le fanau i lona soifua aemaise o la latou mafutaga. O le Susuga ia Mose Lata na ia saunia le upu faamafanafana, ona faaopoopo lea i ai o le Susuga i le Toeaina.



Na ou molimau i lona soifua faale-agaga, ma faaiu ona toe sauniga i lona oliolisaga tumau i lona aiga i Saleaamua lava. "Amuia e faanoanoa, aua e faamafanafanaina i latou."

Ia manuia le malaga.

Saunia:

Pati Vili

### Atalia Tagaloamatua

Seumanutafa Lolini

Setema 16 1932 - Ianuari 24 2009

O ona matua o Mataafa Isamaeli o Vailoa Palauli, ma Siniva Faumui Nuualofa o Vailoa Palauli.

Na faaiipoipo ia Tagaloamatua Seumanutafa Lolini o Apia ma Saoluafata, i le tausaga e 1950.

Ua tele tausaga o galulue laua i le tofi tiakono i Saoluafata. Ma te taunuu mai i le 1982 ia Ianuari ma osi feagaiga ma lenei aulotu i Saoluafata, ua galulue laua

*faaauau itulau e sosoo ai*

## O E UA MALILIU



i le tofi tiakono. Sa tautua faamaoni lenei

tina a o malosi. Peitai ane sa faata'otolia i se gasegase faigata mo ni tausaga pe ono i lona aiga, ma iu ina maliu ai. E asiasi pea iai i lenei tina i Aso Toonai e avanoa ai, aemaise le Aualavou ma le A'oga Aso Sa i Aso Sa uma o Faamanatuga. Na faate'ia lava, aua sa leai se manatu o le taimi lenei o Atalia. Aua sa malaga le tama o le aiga i Apia ma toe foi mai a o taoto lava i lona potu. Sa alu atu le asiasiga a le faifeau i le taeao lava, ae tali mai le fanau, o loo malolo, ae o loo manuia. Ae te'i ua logo mai a'u i le afiafi poo le itula e 4, ua uma lona ola. E moni lava, e ese le manatu o le tagata, ese le finagalo o le Atua. Aua e pule pea le Atua i lana faitalia i le taimi o le tagata.

O ona toe sauniga na faia i le malumalu EFKS i Saoluafata, Aso Faraile i le 9 i le

taeao. O au lava sa taitai ma feagai ma nisi vaega uma o le sauniga, vagana le lauga na saunia e le Susuga Sagone Leilua, faifeau Metotisi Vailoa Faleata. Sa molimau le tama o Tagaloamatua S. Lolini i le la mafutaga. O le Susuga ia Leiataua na faaopoopo i le molimau. O lona tuagane foi o Mataafa Faalumaga. O sui o le fanau, Sinave, Fu'a ma Vaselisa sa molimau.

Na faaiu atu i lona nofoaga tumau ma lagomau ai i lona aiga i Saoluafata.

Amuia e faanoanoa aua e faamafanafanaina i latou. Faamaise le Atua i le tama ma le fanau, ma le paia o aiga.

Samuelu Limuaa Samuelu Olo F.S.



## PAPAUTA: solosolo lelei lona atiina'e

O le ata oi luga, o le ata o se tasi o falea'oga o le Kolisi a Teine i Papauta.

Afai lava e su'e se nofoaga mama; se nofoaga saogalemu; se nofoaga malu puipua; mo tama teine a le Ekalesia ma nisi foi e fia a'o'oga ai,

e leai se nofoaga e aupito sili ona lelei e pei o Papauta.

O le a'oga o loo i se fanua matua manaia lava, lelei le siosiomaga e nonofo tumau ai teine ma a'o'oga. E le popole matua ne'i tupu se faalavelave i se isi. Ua le toe alu se solo i Aso Toonai e o e fagogota i Mulinuu. E le faalavelave mai ni fe'au a se aiga. E le faalavelave mai le tauafiafi ma le po masina ma taaga

a tama ma teine. O le faatamala lava o le teine ia, ae ese le lelei o le mea e nonofo ai ma a'o'oga. E i luga o le vanu loloto ae vaai i sisifo i vaomatua o le mauga o Vaea, e pei ona fai mai le pese: 'Ua ou nofo i luga o le vanu ae ou lata i le vao malu'.

Faatatusa ane e oe pasene o pasi a Papauta i pasi a isi a'oga a le Ekalesia, ona e talitonu lea o loo solosolo lelei le atiinae o Papauta.